



**Kulturimut, Ilinniartitaanermut, Ilisimatusarnermut Ilageeqarnermullu
Naalakkersuisoq
Landsstyremedlem for Kultur, Uddannelse, Forskning og Kirke**

Inatsisartunut ilaasortamut
Jens B Frederiksen
Demokraatitt

Inatsisartunut ilaasortamut Jens B Frederiksenimut, Demokraatit allakkatigut akissut

Inatsisartut suleriaasissaanni § 36, imm. 1 naapertorlugu 18. december 2006, KNR-ip ullaakkut aallakaatitsisarnerup 1. januar 2007-imiit kalaallisuinnaq pisalernissaa pillugu aalajangerneranut tunngatillugu arlalinnik apeqquteqarputit.

Inatsisartut peqqussutaanni § 20 pillugu apeqqutit

Radiukkut TV-kkullu aallakaatitsisarneq pillugu Inatsisartut peqqussutaanni nr. 6-imi, 14. november 2004-meersumi § 20, imm.1, 3, 5 aamma 6-imut tunngassuteqartumik apeqqutit ataatsimoortillugit akineqarput.

Apeqqutini makkua pineqarput: Imm. 1 KNR-ip innuttaasunik kiffartuussinissamut pisussaaffiunut tunngasut, imm. 3 inuiaqatigiinnut tunngasutigit imaqartitsinermut tunngasut, imm. 5 inuiaqatigiinnik ilisimatitsinissamut oqallinnissamullu tunngasut kiisalu imm. 6 eqqumiitsuliornermut kulturimullu tunngasut.

Apeqqutit:

- *Innuttaasut tamakkerlugit oqaatigineqaraangat ima isumaqarnerluni innuttaasut akornanni kalaallisuinnavik oqalussinnaasut kisimik pineqartut? Akissutip tunngavilersorneqarnissaa inussiarnersumik qinnutigaaara (§ 20, imm. 1).*
- *Peqqussummi uani (§20, imm. 3) qanoq assigiinngitsigineri pineqaraangat ima isumaqarnerluni innuttaasut akornanni kalaallisuinnavik oqalussinnaasut kisimik qanoq assigiinngitsigineri pineqartut? Akissutip tunngavilersorneqarnissaa inussiarnersumik qinnutigaaara.*
- *Innuttaasut pineqaraangata ima isumaqarnerluni innuttaasut akornanni kalaallisuinnavik oqalussinnaasut kisimik pineqartut? Akissutip tunngavilersorneqarnissaa inussiarnersumik qinnutigaaara (§ 20, imm. 5).*
- *Peqqussummi uani tamatiguussuseq aamma amerlasuunut sammissuseq pineqaraangat ima isumaqarnerluni innuttaasut akornanni kalaallisuinnavik oqalussinnaasut kisimik tamatiguussusiat aamma amerlasuunut sammissusiat pineqartut? Akissutip tunngavilersorneqarnissaa inussiarnersumik qinnutigaaara (§ 20, imm. 6).*

28. december
2006
J.nr. 58.14-00003
Dok.nr.222253

Postboks 1029
3900 Nuuk
Oq/tel +299 34 50
00
Fax +299 32 20
73
Kiiip-mail@gh.gl
www.nanoq.gl/kii
P

Akissut: Kalaallit Nunaanni innuttaasunut ilaapput inuit aalajangersimasumik Kalaallit Nunaanni najugaqartut, oqaatsit sorliit ilitsoqqussaralugit oqaaserineraat apeqqutaatinnagu. Inatsisartut peqqussutaanni § 20-mut oqaaseqaatini ersippoq ”siunniussaasoq, KNR-ip aallakaatitassanik sullissinernillu neqeroorusiornermini inuiaqatiginni assigiinngitsunik oqaasillit qissimigaassagai.”

Naalakkersuisut KNR-illu akornanni innuttaasunik kiffartuussinissamik isumaqatigiisummi, 2007-imi TV-kkut nutaarsiassanik aallakaatitsarnissaq pillugu aalajangersarneqarpoq, KNR ukiup qaammataani qulini minnerpaamik ataasiarluni nammineerluni suliamik nutaarsiassanik aallakaatitsissasoq, minnerpaamik minutsinik 20-nik sivisussuseqartumik qallunaatullu allatanik oqaasertalersukkamik. Aasap qaammataani marlunni kalaallisut nutaarsiassanik minnerpaamik minutsinik 15-inik sivisussuseqartunik aallakaatitsisoqartassaaq, qallunaatut allatanik oqaasertalersukkanik.

Radiukkut nutaarsiassanut tunngatillugu isumaqatigiisummi aalajangersaqqavoq qallunaatut nutaarsiassanik aallakaatitassiorneq nammineerluni suliaq minnerpaamik ataasiussasoq. Qanoq siviutiginissaa piumasaqaatigineqanngilaq.

Inatsisartut peqqussutaanni § 20, imm. 1 naapertorlugu, KNR-ip aammattaq internet siammaassinerlut atorsinnaavaa, taamaamallu Kalaallit Nunaat pillugu nutaarsiassat amerlanerit KNR-ip qallunaatuunngortittarniarpai, www.knr.gl –imullu ivertillugit.

Aallakaatitassianut allanut tunngatillugu, TV-kkut aallakaatit avataaneersunit suliarineqartut ersarissumik amerlanerussuteqarput, taakkualu qallunaatuujunngikkaagamik qallunaatut oqaasertalersugaasarput. Tamatumunnga pissutaavoq, KNR-ip nammineerluni aallakaatitassiornissamut nukissatigut periarfissarisai killeqarmata. Taamaalilluni kalaallisut kalaallisullu oqaasertalersorlugit aallakaatitassiat taama ikitsiginerat allatut ajornartumik taamaalortariaqarnermik pissuteqarpoq, aalajangersimasumik politikkeqarnermik peqquteqarani.

Akerlianilli radiukkut kalaallisut aallakaatit amerlanerupput, taakkua 2007-imi piffissap nassitsiviusup 58,2%-erissavai, qallunaatuinnarli aallakaatit minnerpaamik 10,4%-iusussaallutik. Aallakaatit sinneri – nipilersugaanerusut – tamanut saaffiginnittuupput.

Naalakkersuisuniit KNR-ip kiffartuussinissamik isumaqatigiisummi allaqqasunik, pisussaaffimminik tamanik attassiinnarnissaa qularnaarumaneqarpoq, Naalakkersuisullu ilimagisarivaat KNR-ip isumaqatigiisut malissagaa.

Apeqqut: Naalakkersuisut isumaat unaanerluni innuttaasuni ikinnerussuteqarlutik kalaallit oqaasiinik ilitsoqqussaralugu oqaaseqartuunngitsut sapinngisamik annertunerpaamik isumagineqarnissaat qulakkeerneqartoq KNR-ip siulersuisuisa aalajangiussaanni? Akissutip tunngavilersorneqarnissaa inussiarnersumik qinnutigaara.

Akissut: KNR Naalackersuisunut ilisimatitsivoq, qallunaat oqaasiisa atornerqarnerisa annikillinerat oqaatsitigut politikkimik isummersornermilluunniit aalajangersimasumik tunngaveqanngitsaq, tassaasorli KNR-ip maannakkorpiaq aningaasaqarnikkut sulisoqarniarnikkullu inissisimanagerata kingunerisaat. Naalackersuisut isumaqarput pissutsit taamaatsillugit KNR-ip innuttaasut akornanni ikinnerussuteqartut kalaallisuunngitsorlu ilitsoqqussaralugu oqaaseqartuusut annertunerpaamik isumassorai.

Inatsisartut KNR-ip atortuisa digitalinngornissaat aalajangiukkamikku kissaatigaat, digitalinngortitsinerup nassatarissanngikkaa kalaallisut aallakaatitat ikilisinneqarnisaat. Kisianni KNR-ip atortunik digitalinngortitsineq ingerlatsinermut aningaasaliussanik aningaasalersortariaqarpaa, tamatumalu nassataraa 2007-imi aningaasaqarniarneq ilungersunartussaammat. KNR-ip naatsorsuutigaa aningaasaqarniarneq 2008-mi pitsaanerulissasoq, atortunik digitalinngortitsineq sipaarfiusussaammat. Tamatumalu nassatarissavaa aallakaatitassiat qallunaatuut qallunaatullu oqaasertalersukkat amerlinissaat periarfissaqalissammat.

Apeqqut: *Peqqussummi § 22, imm. 2-mi allaqqavoq: "Innuttaasut KNR aqqutigalugu paasissutissiinnaanissamut periarfissinneqarnissaat KNR-ip qulakkiissavaa." Innuttaasut pineqartillugit, innuttaasut kalaallisuinnaq oqaasillit pineqarpat? Akissut inussiarnersumik tunngavilersoqqunearpoq.*

Akissut: Qulaani oqaatigineqartutut Kalaallit Nunaanni innuttaasuupput inuit Kalaallit Nunaanni aalajangersimasumik najugaqartut, oqaatsit sorliit ilitsoqqussaralugit oqaaserineraat apeqqutaatinnagu. Innuttaasut ilaannut qallunaatut oqalussinnaanngitsunut KNR tassaavoq radiukku TV-kkullu periarfissaq pingaarnerpaaq amerlanertigullu tassaalluni periarfissatuaq, taamaammat KNR-ip sallerpaatillugu suliassaraa innuttaasut pineqartut – Kalaallit Nunaanni amerlanersaasut - sullinnissaat.

Kalaallit Nunaanni aalajangersimasumik najugaqartut, kalaallisut oqalussinnaanngitsut nutaarsiassanut, inuiaqatigiinni pissutsinut kulturimullu tunngasutigut kalaallisut oqaaseqartutulli pisariaqartitaqarput. Taakkua inuiaqatigiinni oqallinnermut peqataanissaminnut periarfissaqassapput, tusagassiuutitigut naqitatiguinnaanngitsaq aammali KNR-kkut.

Apeqqut: *§ 26-mi ima allassimavoq: „Innuttaasut aallakaatitsineq pillugu tusarniarneqartarnissaat KNR-ip qulakkiissavaa.“ Innuttaasut pineqaraangat ima isumaqarnerluni innuttaasut akornanni kalaallisuinnavik oqalussinnaasut kisimik pineqartut? Akissutip tunngavilersorneqarnissaa inussiarnersumik qinnutigaa.*

Akissut: "Innuttaasut tamarmiusut" qanoq paasineqarnissaannut tunngatillugu siuliani apeqqummut akissut innersuunneqarpoq. Inatsisartut peqqussutaanni aalajangersarneqanngilaq qanoq iliorluni tusarniaasarnissaq qularnaarneqassasoq. KNR-ip siunnersuutigaa Radio TV-lu pillugit Aalajangiisartut atuisartut akornanni misissuissasut. Taamatut

misissuinerup pisariaqarfiatigut naatsorsueqqissaarnikkut misissuinermi toqqartueriaatsit atorneqartartut maleruartaussaassavai.

Apeqqut: Inatsisartut peqqussutaat nr. 6, 14. november 2004-meersoq radiokkut tv-kkullu aallakaatitsisarneq pillugu missingersuutaava imaluunniit unioqqutinneqartussaannigila?

Akissut: Inatsit sunaluunniit imaqartarpoq malittarisassanik imarisamikkut missingersersorneqarsinnaasunik, tassami ajornarsinnaavoq imaluunniit piviusorpalaartuunani eqqoqqissaartunik malittarisassiornissaq, kisianni inatsisinut akerliusumik iliortoqassanngilaq. Tamanna aamma radio tv-lu pillugit peqqussummut tunngatillugu atuuppoq.

Apeqqut: Naalakkersuisut KNR-ip siulersuisui attaviginialersaernerlugit peqqussutip siulersuisunit malinneqarnissaa anguniarlugu imaluunniit Naalakkersuisut immikkut ittumik ataatsimeersuarnissamik aggeqqusinialersaernerlutik siulersuisunut inunnik akisussaaffimminnik ilisimaarinnittunik innuttaasut peqqussullu pineqartillugit inissiinissaq isumagalugu? Akissutip tunngavilersorneqarnissaa inussiarnersumik qinnutigaara.

Akissut: KNR namminersortuulluni pisortatigoortumik sulliviummat namminerisaminik siulersuisulik, Naalakkersuisut apeqqutini KNR-ip aallakaatittagaanut taakkualu katitigaanerannut tunngasuni ilitsersuisinnaatitaanngillat. Tamannami aamma naqisimaneqarani tusagassiorsinnaatitaanermut akerliuvoq. Kisianni KNR innuttaasunik sullissinissamik isumaqatigiissuteqarfigineqarnikuuvoq, taannalu malillugu nunatta karsianiit akiliisoqartarpoq, aningaasaqarnermut inatsisikkut aalajangiunneqartartunik, sullinneqarnernut nassuiakkanut atugassanik, oqaatigineqareersutullu KNR-ip isumaqatigiissutip malinnissaa pisussaaffigaa.

KNR peqatigiiffiunngimmat piginneqatigiiffiunaniluunniit ataatsimeersuartaqarneq ajorpoq. Inatsisartut peqqussutaanni § 31 naapertorlugu siulittaasoq siulersuisunullu ilaasortat ilaatigut Naalakkersuisunit ilaatigullu soqutigisaqaqatigiinnit toqqarneqartarput. Siulersuisut katitigaanerat toqqaariaaserluunniit allanngortinneqassappat, tamanna Inatsisartut peqqussutaata allanngortinneratigut pisariaqarpoq. Naalakkersuisut taamaaliornissaminnik pilersaaruteqanngillat.

Ikinngutinnersumik inuulluaqqusillunga

Tommy Marø
Naalakkersuisunut ilaasortaq